

Azel n Tzilla wa u'nessin

ⵓⴽⵉⵎ ⵏ ⵜⴰⵣⵉⵏⵜ ⵏ ⵓⵏⵏⵉⵙⵉⵏ



Sennet lamarat f tiččelt..

Tamezwart:

Iggen hed yeččer-d s yiḍes tfuyt f wallay, d amayer yettuy yiwi iḍ-s yesheḥ la f lḥiyet, yeččer yettyar inawel yesbey luḍu yenna awid ad rebbsey bettek ald tali tfuyt d aweḥdi d amayer d aḥram tzallit wext-nni (timirt n wallay n tfuyt), yebbi-d Lquran yenna Reb ay-yeyfer awen uwexxer awid ad eezmey bettek izijek, yerzem-t mani yiweḍ dys taxerrubt-s yaf llayet 54 n tsurret n Meryem (S), mani yettwabder dys Baba-nney Smaeil (Z) d ay ittuy yeḥraṣ ittwaṣṣa at yersen f tzallit d uzakka... yerni aezam l dessat f tesreḥ n wasriwen iwriṣen yaaal mani n wesjad,.. ctud yiweḍ llayat i yenna dysent Reb lealamin ayenni llan lmeena-s Tugyersant-nney :

“Asen-d xelfen-ten iggen midden illan ḍiyyeen tiẓilla-nsen tebeen irkasen n wul inennu sulles yeḥsen batta yad afen (59) anday yi wi tuben sysen yeḡ tiweḥḍiyin inenni ad atfen tajemmi Uyuc ul ttwiḍlimen ukan tiqqet (60),...”

Fayd sennet:

Suġġmet awen-rniy; deġġid-nni ya i yettes dys al zzeazeε, qbel mad d-yeččer allay n tfuyt, yak yezru dy tirjet belli muqqel batta i yettuy iteġ d lxir i midden, ay ulun ferħen sys, axi yeffey-as-d iggen yicemj yifaw udem-s yezmumi, yessed tamurt ibda yettwašša-t yetteawad f wextam azeim d webdar n Uyuc, am wi xsen as-yini: “A bnađem w’ac-neffeen warrazen-č bla inennu”... Lmeena-s : Ad yili ħed sejney ul-s ula muqqel batta d amellal, iteġ lxir lquwet, ineffeε midden, itħawal arrazen, axu yettmermed tżallit ney yettetta abdar n Uyuc, ssenet ambatta ul yeġġi dys çra!

Subħanu Yuc-nney Ameqran yetticc-aney lamařat ul keřřment wel sjemmident, “ssawadent ayyul aaaaal aman” manci qqaren! Lquran d awal n Yuc, d tifawt n wul, weħd-s yessawal-asen i bnudam, ittwelleh-ten (amħmu mi t-ezmen ħewwsen ad ssnen batta yeqqar). Lquran ul yusir waya nyar yenkeđ tabea-s asen-ibiyen i At Dunnit belli lla n tidet yus-asend s Bab ixelqen ddunnit, weħd-s yessawal i wi yers timezyin, weħd-s yessečna abrid i wi yers tiřřawin, tiřřawin d tmezyin n wul... Wama tirja timbarcin, dey netniti an igget tebratin ney lamařat, yetteġġ-ament tayetti sy bnudam wasi yettamen s Lyib d way llan lquđret n Reħ lealamin.

Tadfi n wiwal:

Tżallit d ammud n Ddin, atet-tafem dima ttwabdar d tamezward beed Liman. Reħ ayen-yehda a’nedwel l webrid, yak necni bekri-nney neččer-d s yiwalen-u: “A memmi, txeds Reħ lealamin ad idħella deč ihfeđ-ac đħella ziy dy tżallit-č ”... “Bder Yuc ac-yebder tcekred-t, a wal tetta batta kid txeds-t y Netta w’ac-ittetti”... Awen-nešħey a tawwat nešħey iman-ik” zzar; tżallit timirt-s tella ttrigil bnađem an teyda, ttarra-t f wawđa tirmeġġa d třacciwin n iburad ufriyen n dunnit tayeddart... Tżallit mayer teccur s yibedduren imbarcen d twatriwin i Reħ lealamin, m’as-tesja i bab-s tteġġ-as an iggen weyduł s Reħbi, yessadal-as f utiwri n Yiblis w’asd-yettis, w’as-yesčewčiw w’as-yettciri tawenjimt-s s tbebujin d lbiat innekkđent.

Tameġġarut:

Yuc Reħ lealamin iyen-xelqen, yumer-aney as-ninez akan i Netta, nezzall-as qed n wayenni nnejjem. Bekri zik ttuyent yerney batta-nni d tiřřilla jar deġġid d deggwas : Yiru, Talġi, Aydelsid, Tizzarnin, Tak^wřin, Tisemsin, Tinniđes, Azġenyid... Axik Yuc d Aħnin yefney, yessen bnađem wiji gaε atent-yawed yili yesmunkez fell-aney yejj-d y’ayenni ferđen: semmset. Tiđidentin a’nezzal-itent d aneffel ukan, mi nufu.

Wama tẓallit iferden, Bab-nney iwaṣṣa-yaney yeḥs ad nawi-ted manci yelzem lhal, timirt-s mi tuteḥ, u'tt-neswxxir, labudd a'nerna ul-nney neṣber yeḥs bla umejred, bla ukessel, bla ufafa... Labudd a'nesseḥder tawenjimt-nney dy tẓallit mayer ayend wext-nni d timirt as-yessawal dys icemj i Baba-s, yettbatta-t yettmetra dys layna yessezref-t acca dy tmeddurt n dima dima, d tifirt beed is-yucu iman-s ddunnit.

A Reḥ ayen-yehda. A Reḥ ayen-d-yuc lehna...

*Kiy ssney, uriy iwalen-ik^w s yigget Tugyersant teqqur f imekras d tmekras n imar-u. Beḥani, bah aten-jjey berrsen ad ssnen Tumẓabt-nsen... yak wi berrsen yettaf!
Wi uzgen tira-k^w yerga-d dysent tadfi, ad yessiweḥ tabrat i wa u'nugiz -ula s wiwal
ad yay Ncalḥeh arrazen n wenṣaḥ yad yenṣeḥ tarwa n yimselmen i uḥhella tẓallit.*

Tuyim tanemmirt.

Aḍu n Waydelsid, Tiniri n Warejlen, 03 Ctember 2014.





سنت لامارات فتيتشلت..

تامزوارت:

يئن حد يتشرد سبيصس تفويت فوالاي، دامغر يتوغ بيوي بيسس يسهر لا فلحيت، يتشر يتغار يناول يسبع لوضو يتا اويد ادر تصغ بتك آلد تالي تفويت داوحدي دامغر داحرام تزلت وختي (تيميرت نوالاي نتفويت)، بيتد لقوران يتا رب ايفغر اون ووخر اويد ادعزمغ بتك يزچك، يرزمت ماني بيوض ديس تاخر بوتس ياف الآية 54 نتسورت نمريم (س)، ماني يتوادر ديس باباغ ساعيل (ز) د واي يتوغ يحرص يتوآصا آت غرسن فتزلت د وزاگا... يرني اعزام لدسات فتسرت نواسريون يوريعن غالا ماني نوسجاد،.. شتود بيوض الآيات نيئا ديسنت رب العالمين ايي لان لمعناس توفغرسانت نع: ”آسند خلقنتن يئن ميئن يلان ضيعن تيزيلا نسن تبعن يركاسن نول يتنو سولس غفسن باتا عاد افن (59) انداي غي وي توبن سيسن يدج تيوحديين يئي ادافن تاچي ويوش ول تويزلمين وكن تيتت (60)،...“

فايد سنت:

سودجت اوترنغ؛ دجيتي يا نيطس ديس آل زعاع، قبل ماد يتشر الاي نتفويت، ياك يزرو دي تيرجت بلي موقل باتا نيتوغ يتدج دلخير نميدن، ايولون فرحن سيس، اخي يفعاسد يئن يشمج ييفاو ودمس يزمومي، سيد تامورت ييدا يتوآصا يتعاواد فوختام ازعم د ودار نووش، انوي حسن اسيني: ”آ بنادم واشتفن وازرنش بلا يئو“... لمعناس: اد ييلي حد سجع ولس ولا موقل باتا داملال، يتدج لخير لقوة، ينع ميدن، يتحوال ازان، اخو يتمرمد تزلت نع يتتا ابار نووش، اسنت امباتا ول يدجي ديس شرا!

سبحانه يُوشنَع امقران يئيشانَع لامارات ول كرمَنت ول سجمَيصَنت، ”ساواصَنت اغنول آاااا امان“ مانشي قارَن! لقوران داوال نوئوش، دتيفاوت نوول، وحَدَس يَساوالاسن يبنودام، يتولَهَتَن (امو مي تعزَمَن حوسن ادسنن باتا يقار). لقوران ول يُوسير واغا نغار يَنكُص تابعاس استيبين يات دوتيت بلي يلا نتيدت يُوساسند سباب يخلَقن دوتيت، وحَدَس يساوال نوي عرس تيمزغين، وحَدَس يسشنا ابريد نوي عرس تيطاوين، تيطاوين د تيمزغين نوول...

واما تيرجا تيمبارشين، دغ تنيتي ان يفت تيرتين نغ لامارات، يتدجاسنت تايي سي بنودام واسي يتامن سالغيب د واي لان القدره نرب العالمين.

تاضفي نويوال:

تزاليت دامود ندين، اتتافم ديما توابدار تامزوارت بعد الامان. رب اغنيدا ادول لوپريد، ياك نشني بكرينَع تشرَد سيوالنو: ”امي، تحسد رب العالمين اديضهلا دتش يحفظاش ضهلا زبغ دي تزايتتش “ ؛ ” بدر يوش اشيدر تشكرت، ا وال تتا باتا كيد تحست غنتا واشيتي ...“

اوتصحغ اتاوات نصغ يمانيك زار؛ تزاليت تيميرتس تلا تريفيل بنادم ان تغدا، تازات فواوضا تيرمدجا د تراشيوين نيوراد و فريغن ندويت تاغدارت... تزاليت ماغر تشور سيبدورن ميارشن د تواتريوين يرب العالمين، ماستسجا يبابس تدجاس ان يشن ويدول سري، يسادالاس فوتيوري نيبليس واسديتيس، واسيسنشونشيُو واسيتشيري تاونجيمتس ستبعوجين د ليعات يئكصنت.

تامدجارت:

يوش رب العالمين يعنخلقن، يومرانع اسنينز اكان يننا، نزالاس قد نوايتي نجم. بكري زيک، توغنت غرنغ باتايي تيزيلا جار ددجيص د دوفاس: غيرو، تالحي، ايدلسيد، تيزارين، تاكرين، تيسمسين، تيبصس، ازجنيص...

اخيك يوش داحنين غنغ يسن بنادم ويحي فاع اتتياوض يبلي يسمونكر فلانع يجد غايي فرض: سمست. تيبصصنتين انزاليتنت دانقل وکان، مي نوفو. واما تزاليت يفرصن، بابنغ يواصايانغ غفس اد ناويتد مانشي يلزم لحال، تيميرتس مي توتف، وتلسوخير، لابد اترنا ولنغ نصبر غفس بلا ومجرص، بلا وكسل، بلا وفافا... لابد انسحصر تاونجيمتغ دي تزاليت ماغر ايند وختي تيميرت اسيساوال ديس يشمج يبابس، يتباتات يتمترا ديس لاغنا يسزرفت اشا دي تمدورت ندما ديما، تيفيرت بعد يسوشو يمانس دوتيت.

ا رب اغنيدا. ا رب اغند يوش لهنأ...

كيغ سنغ، وريغ يوالنيك سيقت توفغرسانت تقور فيمكراس د تمكراس نيارو. بلعاني، باه اتننغ برسَن ادسنن تومزابتسنن... ياك وي برسَن يتاف! وي وزن تيراك يرفاد ديسنت تاضفي، اد يسويوض تابرأ يوا وتوفيز - ولا سويوال ادياغ ان شاء الله ازارن نونصاح غاد ينصح طاروا نيمسلمان بوضهلا تزاليت.

توغيم تانميرت.

أضو نوايدلسيد، تيزيري نوارجلن، 03 شتمبر 2014.



